

樊榭山房全集

冊八

樊榭山房文集卷第六

錢唐 厲 鶚 太鴻

秋日遊四照亭記

四照亭在

聖因寺後孤山巔宋辨才師有四

照閣懷少游學士詩周少隱太倉稊米集云關氏四照閣在孤山部使者至京神宗問關氏四照閣何在部使者失對按關氏名魯錢唐人生六子皆舉進士景仁景山最知名孫澥注沼等亦以文著閣蓋其家所剏閱世既遙蕪沒莫辨此四照亭之始爲四照閣也

今上御宇之初以西湖行殿爲寺尙書彭城公建旄於浙政優人愉領賓頻眺山環水合謂地宜亭揭其名者無以易乎關氏之舊至徹

上聽

御書雲峯四照四大字以賜於是刻之金版懸之
繡楣山祗水仙抃駭訶衛此四照閣之復爲四照
亭也閣逢攝提格壯月之二十一日潦畢秋淨命
舟嘯侶經乎禪窟入乎獨園梁空水而鶴影丁椿
據盤石而苔花駁瑩仰睇巖際勝貪勞渴少休而
上踐側磴之棧齾陟樓臺之巉巖穿步櫺之迤逶
歷密林之萃萳再休而至于亭憑闌列坐秋事大
獻獻於目也翠潏澄鮮山含涼煙獻於耳也離蟬
碎蛩咽咽喁喁獻於鼻也桂氣晻夢塵銷禪在獻
於體也竹陰侵肌瘠痺以夷獻於心也金明瑩情
天肅析醒若夫湖濬盡處萬雉所環中有走輿飛
蓋之倫慮焦於民事居奇挾羸之子內熱於貨財

識秋之真富秋之暇佳時勝履正屬我輩曷可無
述同來者麟徵師李聖幾

九日行菴文讌圖記

行菴在揚州北郭天寧寺西隅馬君嶰谷半槎兄
弟購僧房隙地所築以爲遊息之處也寺爲晉謝
太傅別墅西隅饒古木鬱鬱陰森入林最僻不知
其近郭郭菴居其中無斲礱髹采之飾惟軒庭多
得清蔭來憩者每流連而不能去乾隆癸亥九日
積雨旣收風日清美遂約同人咸集於斯中懸仇
英白描陶靖節像采黃花酌白醪爲供乃以人世
難逢開口笑菊花須插滿頭歸分韻賦詩陶陶衍
衍觴詠竟日旣逾月吳中寫真葉君震初適來羣
貌小像合爲一卷方君環山補景命曰九日行菴

文讌圖裝池成將各書所作於後而屬鶚爲之記
 按圖中共坐短榻者二人右箕踞者爲武陵胡復
 齋先生期恆左抱膝者爲天門唐南軒先生建中
 也坐交牀者二人中手牋者歙方環山士庶左仰
 首如欲語者江都閔玉井輩也一人坐藤墩撚髭
 者鄞全謝山祖望也一人倚石坐若凝思者臨潼
 張漁川四科也樹下二人離立把菊者錢唐厲樊
 榭鶚袖手者錢唐陳竹町章也一人凭石牀坐撫
 琴者江都程香溪先生夢星也聽者三人一人垂
 袖立者祁門馬半槎曰璐二人坐瓷墩左倚樹右
 跂腳者歙方西疇士虔汪恬齋玉樞也二人對坐
 展卷者左祁門馬嶰谷曰琯右吳江王梅泝藻也
 一人觀者負手立於右江都陸南圻鍾輝也從後

相倚觀者一人歛洪曲溪振珂也童子種菊者三人樹間侍立者一人撰杖執卷者各一人其植有蕉有竹又有雜樹作丹黃青碧之色紀時也夫重九佳名舉俗所重而高常侍歎獨坐以搔首陸天隨感登高以敷門無其時地與人耳今吾儕幸生太平遇勝地又皆素心有文之侶固爲人世不可多得之會而此十六人者或土斷或客遊聚散不常異日者歲月遷流撫節物以有懷一披此圖恍如晤對將來覽者或亦不異此意乎

佛日淨慧寺遊記

杭諸山起天目蜿蜒翔躍數百里羅於城西南瞰青矚碧其名最夥跳而之北郭是爲三山曰臯亭黃鶴臨平著勝幽謀地偏境奧游者罕至佛日淨

慧寺在臯亭之陰黃鶴之麓距臨平十里而近念
宋蘇文忠秦太虛楊次公司馬才仲元鮮于伯幾
皆屢及於是述之詩筆與山並壽不可以不遊發
興於甲寅月正九日約王瞿

曾祥

丁敬身

敬

汪師

李

沆

同舟出郭門搖兀五十里過赤岸桐扣進湯

家堰捨舟而陸桑野沃衍可喜望兩山嶽崆互複
中諸峯巖巖狀如爭獻瑰瑋一峯爲儕輩所懷如
墮其脇獨高絕處闖然不能匿春寒薄陰餘雪晶
晶離離爲之目奪心誘於千仞之表卽黃鶴峯也
緣溪行水漸狹漸清石子五色布散被以荃蒲蘊
苔綠縹如洗旁多古櫟大松或欹或直行且翫入
寺曛黑矣向主僧借榻畢復走寺前左偏小石橋
上橋下爲潭亭面橋萬竹翳亭後時陰靄四合暎

留不可辨惟聞泉籟淒戛瓦雪釋霽旁晚有怪梅
臨潭上始著花潭氣鏡空晃激花上縞幽曜冥光
景奇絕少選片月出林表朧朧微露人影靜對不
足寺門欲闔歸宿東廡之樓下月轉寒偏相與賦
詩未就起視殿角一小山隙平而椒銳沈碧近人
達旦視之叢灌也十日澄霽僧具粥已引余輩取
徑寺後循東麓下溪中多大石陂陁隱見水漫流
其上勢偃怒殺則如鳴玉鼓絲之聲始歎坡公土
肉山骨之句爲善寫物狀窮水源得龍藏泉石裂
若蛻亂泉陟崖腹得龍洞頂平若堂左折而上爲
仙姑洞口仰出若壺窺之下黝然深稍進又一穴
其深不測衆掉慄莫敢入日未亭午別僧歸是行
也敬身師李與予各得詩四首瞿作遊錄末云以

薦後之來者噫林藪巖竇之觀大塊之所薦於屏
處者以娛其湮鬱也雖文忠太虛諸公亦暫至耳
彼昧者遊之目接而神馳足蹈而趨背得不虛子
之薦乎吾與子幸與山鄰姑務屢遊以毋虛大塊
之所薦聊憶以爲記

開濬西湖碑記

代王都運作

皇帝御極之二年化浹恩沛川瀆貢珍育物之仁
與天無極

特軫東南民力將興水利乃博采羣議以杭州西
湖可溉上塘田千頃近漸湮塞

詔浙省臣工亟謀開疏之宜事下前督撫議支藩
庫以役民夫未歲事去鈞奉

命運離是邦謬荷重寄於恤亭戶蘇罷商外思所

以報效萬一竊聞古轉運之職在漢治粟內史有
幹官如淳謂主均輸之事謂筦鹽鐵而榷酒酤也
唐置重臣爲諸道轉運鹽鐵使而引水入田之法
見於白公錢塘湖石記宋至道三年分天下爲十
八路兩浙合爲一並置轉運使副熙寧七年始於
杭州置司漕挽芻粟一以歸之其時能於官者往
往以釃析河渠著聲沿及元明運使始專理漕政
則運鹽諸河尤當興復轉運之兼水利由來久矣
因願捐己貲如前所議之數畢力挑濬微臣涓埃
之忱得達

宸聽旋蒙

俞旨俯允鈞聞

命之下忻忭踴躍循視湖堤審其淤塞之狀則裹

湖自孤山路迤西向爲有力者占種菱荷漸次沮
洳十之二三焉外湖自柳洲迤南過湖心寺縱橫
十餘里葑老根深雲橫陣布姦民將覬爲稻畦十
之七八焉於是簡委賢員召夫以萬指計畚鍤雲
集晴霽而作霖潦而止葑者薙之淺者疏之始雍
正二年十一月初十日訖雍正四年十月二十日
凡闊以丈計者若干深以尺計者若干若赤山埠
金沙港諸處自明楊公孟瑛開濬後侵爲田廬塚
墓者年久湮壅遽商掘廢恐致公私驚擾欲復如
唐宋時環湖三十里際山爲岸之舊誠未易言唯
是湖面澄泓練如鏡如羣峯鱗鱗倒影在下漁舫
蓴艇縱恣所如郡人來遊者咸快舊觀之頓還旱
乾之有賴也欽惟我

聖祖仁皇帝

省方南幸浙中西湖

駐蹕凡五今奉

上諭於

行殿供佛爲報本嚴先之地

天章奎畫照映湖山魚鳥翔泳久久被澤恭以餘

財葺棟宇潔圻填青紅楹檻煥然浮動于水雲光

影中蘇公堤向爲水齧基址日削則將所浚葑泥

加庳爲崇凡三尺增隘就廣凡尺許而城內中河

西小河之與湖流交通者亦浚之以利舟楫東河

受蔡河橋外沙河之水爲鹽艘運道除污展清所

以盡厥職也總會計之實費銀三萬七千七百兩

而開湖之役始告備夫經理西湖自李鄴侯白太

傳以來莫如蘇子瞻楊溫甫子瞻既疏利害于朝
復具申三省籌畫明悉無可摘索而御史賈易已
劾其科騷部內以事遊逐雖廢格不行宰臣未免
有兩罷之請溫甫力排羣議銳意行事終以清理
包占地蕩爲豪右所忌二公雖功在後世所遭逢
何其難也今鈞於二公駑劣無能爲役伏遇

聖天子在上濬川距滄邁舜禹之鴻績舉久墜無
窮之利而施於民不待倡議於有司且閔微勞加
以四級若前撫憲傅公下情旣不壅於

上聞今制府李公督率有司以觀成功然則鈞之
才雖遠不如蘇楊而鈞之遭逢極盛寧非二公所
深願不得者哉事旣竣餘銀五千兩買田若干畝
使籍田戶之租視葑稍生卽募人剗盡歲以爲常

繼是毋廢墜毋侵冒不必設開湖之司立撩湖之軍所以爲此邦生齒計久遠者在是矣爰記顛末以諗來者

田家灣志

入杭城北武林水門二里而近有地曰田家灣故田家橋也橋廢而地存當水洄曲處土人遂呼爲灣若揚之茱萸蘇之明月之類至問田氏爲何人則土人不知考之圖乘亦不詳所始偶閱葉紹翁四朝聞見錄有云田家橋在北關門內莫知名橋所自開禧時朝廷建宅以賜田俊邁之子蓋有兆之于先者按宋史寧宗紀開禧二年韓侂冑枋國五月下詔伐金以池州副都統郭倬主管馬軍行司公事李汝翼會兵攻宿州敗績郭倬等還至蘄

縣金人追而圍之倬執馬軍司統制田俊邁以與金人乃得免三年八月有司上開禧刑名斷例斬郭倬於鎮江不書賜宅事惟岳肅之程史云郭倬等受圍斬縣大酋僕撒索堇者使謂汝翼曰田俊邁守濠實誘我人而啓釁端執以歸我我全汝師汝翼不敢應池州帥司提轄余永寧勸倬倬執俊邁與金人乃折箭爲誓啓門以出二將後朝廷命大理正喬夢符於京口治俊邁獄永寧磔死倬棄市汝翼以不出語竄瓊州俊邁家賜宅予官正葉紹翁所紀田家橋賜宅爲先兆者俊邁召釁被執非臨難不屈者比倬誅而俊邁之子賞侂冑主兵欲以揜敗衄之恥也賞罰不當莫此爲甚史筆失書寧免疎略之責邪若田灣之名何必以俊邁

著哉

屠墟廟志

雍正乙卯寒食日予汎輪歸自西溪憩於古蕩見有奏伶樂神者問其廟曰屠墟也問其神曰城陽景王劉章也予悚然曰有是哉王之功在漢社稷人心尙不泯邪溯王以高帝孫齊王子弱冠入宿衛維時娥姁牝晨外族構亂妻王祿女規爲密黨天祚漢室悉其本謀歌言田意酒行軍法遂首倡大義告齊發兵陰結平勃北軍左袒擊產斬祿如殺狐鼠方是時安劉氏者平勃功爲多惟王實始終之若嬰若寄若窋若通若揭皆倚以爲強因之集事使非齊國稱戈未央入衛則外兵莫召褫祿魄者無人南軍尙存斷產頭者恐不勝也王初封